

Vullesman mag disse “Zak” ook met ?

Enk Spaon oftewel . . Henk Spaan . . ad jören gelejen een column die stienvast endigden met disse kreet. IJ ad dan weer ien of andere *minkukel* op de körrel enömmen en de conclusie etrökken . . . ofvoeren en weg der met !!

Maer wörumme begun ik ter ier dan aover of wat wil ik oe dudelijk maeken?

Ärgenisse alumme. De menderne meniere van umme gaon met oew lèëfumgèving is op zien zachs uutgedrukt *iene grote ärgenisse.*

Op de eerste de beste vekansiedag dät ik men mien kleinzönne naor de Noorder Kolke an 't Zwärtewater bin evaeren ebben wi'j, zoas wi'j dät altied doet, eerstens is èven langes de waterlijn en deur 't ondiepe elopen en ekeken of ter löge flessen of ander gevöörlijk spul lag.

't Is now ienmaol een stukkien zand an 't open water wöör völle kleine kinderen 't in water kunnen lopen en spöllen en uut eigen ervaerink weten wi'j wat veur akelige wonden dä-j zomaer kunnen oplopen. Want kiek . . . zo'n stukkien lankzaam oflopend zandstrand is netuurlijk ook leuk veur die stoere jonges met die snelle boten. Die dan steeds van döörüut weer anderen achter de boot an willen sleppen. En oe giet dät ook al weer ? . . . ärd praoten, want iederiene mut wel euren dä-j der bint . . . gezellig ! . . biertien derbi'j ! . . elemoale goed zo! Now dan e-j ook wel zo-n bettien de ele vocabulaire van dät soort volk benuumd. En döör begint 't met . . . stoerdoeneri'je . . . kiek dan dät durf ik wel en jao . . . zij kunt ook al bier drinken. Ärd vaeren . . . 't mag weliswöör niet in de kolke, maer ach . . . de andaving is toch verre te zuken en dät is ook nog niet ies 't ärgste zolange der maer, een bettien, rëkening met zwemmers en kleine kinder wörren e-aolen. Maer 't gevöör zit em 't in 't zoepen uut een flesse.

Ik binne zelf al elemaole gien drinker van alco-olaolende dranken as 't zo verrekte wärm weer is, maer um de ien of andere meniere skienen die meesten juist dät mooi of nog ärger *“gezellig”* te vinnen. Mu-j allemaole fijn zelf weten maer astoeblijft . . . nem oe eigen rotzooi . . . en veural die löge flessen weer met naor uus en donder 't in de containers. Die bint döör veur!

Die zo enuumde *gezegligheids vaerders* of de groep *stoere jonges* ebt wärkelijk gien idee wat een gevöör zij met die flessen teweeg brengen. As alco-ol de ärsens antast wil dät veur mi'j nog niet zègen dä-j ontoerèkenigsvatbaer bint en döörumme maer kunt doen en laoten wa-j wilt.

Ook al dänk ie, dät a-j een löge vlesse in dieper water smieten, dät die döör dan wel naor de baodem zal zakken. Meestens blieven die flessen as 't waere zweven en zinken dus niet. Deur al die vaerbewègingen van de boten rollen die flessen toch vrog of late naor de kante. De kans is dan inies eel groot dät de skroef zo'n flesse raeken en kepot slöt. En oe die verrekte skerpe punten of randen der dan uutzien . . . döt allenig bi'j 't zien al piene, laot staon as der iene met de (blote) voeten intrappen.

Dus nog ien keertien . . . Nem astoeblijft oew rotzooi en vulles met en prebeer ook een bettien met oew lèëfumgèving rëkening te aolen.

Alles valt of stiet met de wille van de mensen zelf un eigen gedrach an te passen.

Veur en die dänken . . . ach krieg wat . . . is de anef bedoeld !



*De verzaemelde wårken van . . . **een ander !***



Augustus 2016



Görendrögien W.